

# Cabaran usahawan muda kembangkan perniagaan



PENULIS: DR ANUAR SHAH BALI MOHAMED  
(Pensyarah Kanan Fakulti Ekonomi dan Pengurusan, Universiti Putra Malaysia)

D ATA pengangguran yang dikeluarkan oleh Maybank Investment Bank Research baru-baru ini mendapati kadar pengangguran di Malaysia pada Mac 2019 adalah 3.4 peratus, meningkat 0.1 peratus berbanding bulan sebelumnya iaitu 3.3 peratus.

Data itu konsisten menunjukkan kadar pengangguran di Malaysia dalam tempoh tiga tahun ke belakang ini adalah antara tiga hingga empat peratus dan golongan belia serta graduan merupakan lebih daripada separuh jumlah yang menganggur.

Walaupun Laporan Penyiasatan Tenaga Buruh, Jabatan Perangkaan Malaysia menunjukkan kadar pengangguran belia menurun satu peratus iaitu daripada 11.5 peratus pada suku keempat tahun 2017 kepada 10.5 peratus pada suku keempat tahun 2018, kadar pengangguran dalam kalangan graduan meningkat empat peratus pada tahun 2017 kepada 4.3 peratus pada tahun 2018.

## Meramaikan usahawan

Data itu menunjukkan bahawa langkah kerajaan untuk memberi lebih perhatian kepada bidang keusahawanan terutamanya dalam melahirkan lebih ramai usahawan dalam kalangan belia dan graduan amat bertepatan.

Hal itu disebabkan oleh peluang pekerjaan yang tidak mencukupi bagi menampung bilangan belia dan graduan terutamanya dalam jangka masa panjang.

Langkah kerajaan untuk memberikan alternatif kepada belia dan graduan bagi menceburi bidang keusahawanan akan membantu mengurangkan kadar pengangguran di Malaysia.

Pada ketika ini, keusahawanan merupakan satu daripada bidang utama yang memainkan



PENGUNAAN teknologi dalam perniagaan akan meningkatkan lagi peluang memperoleh pendapatan penjualan yang lebih tinggi.

peranan penting dalam pembangunan ekonomi negara.

Bidang itu juga dilihat sebagai pemangkin kepada peningkatan dan perkembangan ekonomi termasuk dalam peningkatan pendapatan per kapita negara.

Data Unit Strategi Nasional oleh Kementerian Kewangan menunjukkan bahawa sumbangan usahawan kepada ekonomi negara pada tahun 2018 adalah sebanyak 36 peratus dan peratusan itu dijangka meningkat kepada 41 peratus menjelang tahun 2020.

Dalam mendepani cabaran untuk menjadi usahawan berjaya, ada tiga perkara yang perlu diberi perhatian oleh usahawan muda iaitu penguasaan dalam teknologi, disiplin dalam perniagaan dan menjangkakan keperluan masa depan.

Tiga perkara itu perlu dikuasai untuk menjadi sebahagian daripada DNA usahawan muda yang berjaya.

## Penguasaan teknologi

Penguasaan dalam teknologi amat penting



bagi melahirkan usahawan berjaya. Penggunaan teknologi dalam perniagaan akan meningkatkan lagi peluang memperoleh pendapatan penjualan yang lebih tinggi.

Langkah kerajaan memperkasakan e-dagang merupakan langkah singifikan dalam merangsang usahawan muda untuk menggunakan aplikasi itu sebagai platform perniagaan.

Sebagai contoh syarikat e-dagang utama dunia iaitu Alibaba Group (Alibaba) yang mencatatkan penjualan sebanyak AS\$30.8 bilion (AS\$1 = RM4.1405) dalam masa sehari pada 11 November 2018 serta Lazada Malaysia yang mencatatkan lebih daripada 3,000 urusan urus niaga dalam setiap minit pada tarikh sama.

Shopee Malaysia turut mencatatkan kejayaan Shopee 11.11 Big Sale apabila merekodkan 11 juta tempahan dalam tempoh 24 jam yang merupakan peningkatan sebanyak 4.5 kali berbanding pada tahun 2017.

Berdasarkan peningkatan secara signifikan penjualan secara e-dagang di dalam dan luar negara pada setiap tahun, kerajaan melihat adanya keperluan utama untuk memperkasakan perniagaan e-dagang terutamanya untuk membantu menyediakan peluang kepada usahawan di Malaysia khususnya usahawan muda.

## Perdagangan rentas sempadan

Rentetan daripada itu, Perdana Menteri, Tun Dr Mahathir Mohamad melancarkan platform perdagangan e-dagang Bohai Commodity Exchange of China (BOCE) Malaysia/ASEAN baru-baru ini.

BOCE merupakan organisasi yang beroperasi di China sejak tujuh tahun lalu dengan jumlah dagangan bernilai kira-kira 1 trillion Renminbi.

Melalui platform itu, kerajaan berhasrat menggalakkan lebih ramai penglibatan usahawan dalam ekonomi digital dan seterusnya memberikan manfaat kepada usahawan muda yang mahu menceburi keterangkuman digital.

Dr Mahathir juga menjelaskan bahawa melalui platform e-dagang disokong oleh kerajaan, perdagangan rentas sempadan akan menjadi lebih selamat, lebih cekap dan berkesan untuk perniagaan.

Melalui penggunaan e-dagang, maka lebih ramai usahawan muda yang akan berjaya memasarkan produk masing-masing melangkaui sempadan negara dan budaya.

Pelaksanaan e-dagang bukan hanya memberikan pendapatan lumayan kepada usahawan muda malah ia berperanan sebagai serampang dua mata yang selari dengan hasrat Kementerian Perdagangan Dalam Negeri Dan Hal Ehwal Pengguna (KPDNHEP) untuk memacu sektor e-dagang sebagai inisiatif bagi mengurangkan harga barang dan perkhidmatan.

Menteri berkenaan, Datuk Seri Saifuddin Nasution Ismail mengakui bahawa pelaksanaan e-dagang secara meluas mampu menurunkan harga barang dengan berkesan berikutnya adanya persaingan harga yang kompetitif dalam kalangan usahawan selain mengurangkan orang tengah semasa urusan perniagaan. -Bernama